

Headline	Seminar perjas produk halal		
MediaTitle	Berita Harian (Johor)		
Date	18 Jun 2012	Color	Black/white
Section	News	Circulation	231,163
Page No	N14	Readership	1,368,000
Language	Malay	ArticleSize	134 cm <sup>2</sup>
Journalist	N/A	AdValue	MY 1,355
Frequency	Daily	PR Value	MY 4,066



## Seminar perjas produk halal

**P**PASIR GUDANG: Majlis Perbandaran Pasir Gudang (MPPG) dengan kerjasama Jabatan Agama Johor (JAJ) menganjurkan Seminar Kesedaran dan Pembangunan Halal Johor 2012 bagi memberi pendedahan berkaitan produk halal.

Objektif utama seminar sehari yang diadakan di Menara Aqabah, dekat sini, bertujuan mendedahkan kepentingan dan keperluan kepenggunaan halal serta menjelaskan prosedur serta keperluan sijil halal untuk dimanfaatkan sepenuhnya oleh pengguna, pengeluar dan usahawan.

Pengarah JAJ, Datuk Abdul Razak Hassan, berkata seminar dengan kerjasama Universiti Putra Malaysia (UPM) yang dihadiri kira-kira 50 pengusaha makanan bertujuan menjelaskan isu berhubung Sijil Halal Malaysia dan penguatkuasaan Akta Perihal Dagangan 2011.

Katanya, seminar itu juga bagi mendedahkan kepentingan dan keperluan Sijil Halal Malaysia untuk dimanfaatkan sepenuhnya pengguna, pengeluar dan usahawan.

“Seminar ini juga bagi membantu pengusaha makanan untuk mendapatkan sijil halal melalui prosedur yang betul, termasuk bagaimana memohon sijil halal secara talian.

“Kebanyakan pengusaha makanan tahu secara asas berkaitan isu halal seperti penyembelihan haiwan mengikut syarak tetapi dalam hal lain seperti kebersihan dan cara pengurusan makanan yang betul, masih ada yang mengambil mudah hingga antara penyebab mereka gagal mendapatkan sijil halal,” katanya.

Abdul Razak berkata, beberapa topik berkaitan industri halal diketengahkan oleh beberapa penceramah, termasuk berkaitan konsep Halalan Toyibba oleh Pegawai Penyelidik Institut Penyelidikan Produk Halal (IPPH) UPM, Mohammad Aizat Jamaludin dan peluang perniagaan dalam industri makanan halal oleh Jabatan Syariah dan Pemantauan Halal KFC Holding Bhd serta beberapa penceramah lain.

“Seminar seperti ini dapat memberi peluang kepada peserta untuk mengetahui lebih lanjut berkaitan sijil halal dan kaedah yang tepat, termasuk insentif yang diperoleh usahawan dengan pembangunan industri halal.

“Industri halal memang membuka peluang besar kepada usahawan. Peluang yang ada ini perlu diambil untuk membolehkan pengusaha makanan lebih berjaya dengan pengiktirafan sijil halal,” katanya.